



Siunnersuut: Inatsisartut inatsisaasa assigiinngitsut allangortinneqarnerat aamma akileraarutit akitsuutillu kiisalu aningaasanik nuussinikkut isertitat pillugit Inatsisartut inatsisaat nr. xx xx. xxx 2018-imeersoq.

(Aningaasaqarnermut Nunanilu Avannarlerni suleqatigiinnermut Naalakkersuisoq)

Partii Naleraq siunnersuummut imatut oqaaseqaateqarpoq.

Allaffissornerasuup piuarnissaa sulissutiginnissaa Partii Naleqqamit tapersersugarinngilarput. Akerlianik innuttaasut pitsaannerusumik, eqaannerusumik ammalu kaasarfiiniit aningaasanik aalleqattaarnersuaq unitsillugu periarfissiinissaq naleralersornissaq pisariaqarluinnalersoq isumaqaratta.

Siunnersuutigisaminni Naalakkersuisut siusinaartumik pensionisiallit aamma utoqqalinersiallit pitsaannerusumik atugaqalernissaat oqariartuutigiuararaluarpaat.

Partii Naleqqamiit innuttaasut illersuinnarnagit pitsaannerusumik atugarissaarnerulernissaat tamaviaarutigartakkatta pingaaruteqarluinnartut ilagaat, soorlu ukiorpassuarni sulisuunikuulluni akileraartartuunikuulluni ataqqinartumik suliunnaarnersiuteqalersinnaanissaaq. Tamanna oqaasiinnaanngitsumik piviusunngortitariaqalerpoq, ukiut amerlavallaarujussuaqaat neriorsuinnarneqartartulik ajorluinnartumik inissisimanerat eqqarsaatigalugu.

Ataqatigiinngitsulli amerlaqaat uani siunnersuummi. Soorlulusooq SIK-mi isumaqatigiissut naammassineqartoq qiviaannartugu, ilaasortaat artukkeqqinniarlugit suliaasoq, aammalu puigorlulusooq siusinaartumik pensionisiallit aamma utoqqalinersiallit allatuulli nunatsinni atuisuusut isertitaat nioqqutissanut inuuniarnermullu inorsillugit inissikkaluttuinnartut.

Partii Naleqqamiit akuersaarsinnaanngilarput innuttaasut kaasarfiiniit aningaasanik aallerneq oqaasertalerlugu:

“iluarsiissutit annertunerpaartaat atuisunit akilerneqassallutik.”

Naammaleqaaq akitsuusersuinersuaq, ilumullu siusinaartumik pensionisiallit aamma utoqqalinersiallit sullinneqarniaraluarpata periarfissat arlaqarlutik.



Utoqqalinersiutillit aammalu siusinaarluni pensionisiaqartut taamatullu innartuutillit pillugit aaqqiissuuseqqittoqartariaqarpoq, piaartumik aaqqipallataangitsumik tamakkiisumik aaqqissuunneqarsimasumik.

Aappaasup utoqqalinersiai aappaasumut ilanngartuutaajunnaarniarlik, tamarmik naligiittut pineqalerniarlik, inuit naligiipput aappaasoq nalikinnerusutut isigeqartarnera piaarnerpaamik qimanneqartariaqalerpoq, assigiimmik pisartagaqalerneratigut.

Utoqqaat sulisinnaasariaqarput ilanngartuiffigineqaratik isertitaqalaarnertik peqputigiinnarlugu, innuttaasut sulerusuttut tamarmik Kalaallit Nunatta pisariaqartippai, ingammik utoqqaat sulerusuttut sulisinnaasullu misilittagarisai iluatinnaateqartuummata. Sulerusuttut suliniarlik, pillarnagit.

Akitsuutit pinngortitap illersornissaanut peqqupsip illersornissaanut aammalu ileqqorissaarnerunissap anguniarnissaanut sakkussaapput, killilimmik atugassat atuisunut artukkiinngitsumik. Akitsuutit innuttaasut kaasarfiinik aallertarfittut atugassaangillat.

Taamaammat siunnersuummi uani pineqartumi akit qaffakkiartornerat malillugu akitsuutit qaffakkiartornissat uani qitiutinneqartoq Partii Naleqqamiit peqataaffigisinnaangilarput, isumaqaratta akitsuusersuinerit nunap inui innarlerpallaaleraat kaasarfiinik aallerfigalugit.

Akitsuutit allaffissornerup akissaqarnerulernissaanik aqquutissiuissuulersimapput siunertaa qulaani taariigarput malinneqarunnaarluni, minnerunngitsumik nunap inuisa kaasarfiaaniit aallernerummat Partii Naleqqamiit siunnersuut tamakkiisumik itigartipparput

Qujavugut.